

दिनांक 20.04.2025
समय: 18.45 बजे

आकाशवाणी जयपुर-अजमेर
प्रादेशिक समाचार

- मुख्यमंत्री भजनलाल शर्मा महिलावां सूं आत्मनिर्भर बणने रो हेलो कर्यो-शेखावाटी खेतर रे दौरे रे दूजे दिन आज केई जनसभावां ने सम्बोधित कर्यो।
- भारतीय रिजर्व बैंक रा गवर्नर संजय मल्होत्रा कह्यो- देश रो विदेशी मुद्रा बाजार लारले चार बरसां मांय लगे-टके दोगुणो व्ह्यो।
- सिविल सेवा दिवस काले-जयपुर मांय राज्य स्तरीय जळसा मांय श्रेष्ठ काम करण वाळां सिविल सेवकां ने पुरस्कृत कर्यो जावेला
- कोटा मांय आज सूं अंडर-20 राष्ट्रीय कुश्ती हौड़ री सरुआत व्ही-तीन दिन चालण वाळी इण हौड़ मांय देशभर रा 800 सूं बत्ती पहलवान भेळा ।

000

मुख्यमंत्री भजनलाल शर्मा महिलावां सूं आत्मनिर्भर बणणे रो हेलो कर्यो है। वणा कह्यो के महिलावां सरकार री न्यारी-न्यारी जन कल्याणकारी योजनावां रो लाभ उठा र घर सूं ही आजीविका चला सके है। श्री शर्मा आज आप रे शेखावाटी खेतर रे दौरे रे दूजे दिन उदयपुरवाटी रे गुढा मोड माथे राखीजी जनसभा मांय आ बात कही। वणा कह्यो की राज्य सरकार महिला सशक्तिकरण खातिर लगोतार काम कर री है।

.....
मुख्यमंत्री झुन्झुनू टोल प्लाजा माथे भी जनसभा करी। वणा कह्यो की सरकार राज्य रा सगळा खेतरां मांय पाणी पहुंचाणे खातिर हरसंभव जतन कर री है।

.....
मुख्यमंत्री मुकुन्दगढ़ रा राजकीय महाविद्यालय अर चिड़ावा बाईपास समेत केई जनसभावां ने सम्बोधित कर्यो। वणा सीकर जिला रा फतेहपुर मांय बालाजी महाराज अर करुणा महादेव जी रा दर्शन कर प्रदेश री खुशहाली री कामना करी। वणा झुन्झुनू सर्किट हाउस मांय जणसुनवाई भी करी।

मुख्यमंत्री भजन लाल शर्मा रो काले आप रे दौरे रे तीजे दिन पिलानी जाणे रो कार्यक्रम है। वटे वे यमुना जळ समझौते री समीक्षा बैठक लेवेला।

000

देश रा विदेशी मुद्रा बाजार मांय लारला चार बरसा मांय मजबूत वृद्धि देखीजी है। इण बरस 2020 रे 32 अरब डॉलर सूं लगे-टके दोगुणो हो र 2024 मांय 60 अरब डॉलर हो ग्यो। रिजर्व बैंक रा गवर्नर संजय मल्होत्रा बाली मांय राखीज्या एक सम्मेलन मांय आ जाणकारी दी। वणा कह्यो के

लारला कुछ बरसा मांय भारत रो वित्तीय बाजार बत्ती गतिशील अर लचीलो व्हे ग्यो है। **ओवरनाइट मनी मार्केट** मांय भी बधोतरी व्ही है अर इण रो रोजाना रो कारोबार 2020 रे लगे-टके 3 लाख करोड़ रिप्यां सूं बध र 2024 मांय 5 दशमलव चालीस लाख करोड़ रिप्यां सूं बत्ती रो हो चुक्यो हो।

000

केंद्रीय रक्षा मंत्री राजनाथ सिंह काले सिरौही जिले रा आबूरोड थापित ब्रह्माकुमारीज मुख्यालय शांतिवन आवेला। वे डायमंड हाल मांय सुरक्षा सेवा प्रभाग री कानी सूं राखीज्या कार्यक्रम मांय सैना रे जवान खातर **राष्ट्रीय सेल्फ एम्पॉवरमेंट कैम्पेन** री सुरूआत करेला। इण कैम्पेन रे तैत देशभर मांय सेना री 40 डिविजन अर 14 कोर मांय **सेल्फ एम्पॉवरमेंट वर्कशॉप, सेमीनार** राख्या जावेला। इण रो लगस जवानां रो आंतरिक, मानसिक, शारीरिक अर आध्यात्मिक सशक्तिकरण करणो है। इण रे साथै ही रक्षा मंत्री प्रभाग री कानी सूं राखी ज्या पांच दिवसीय राष्ट्रीय सम्मेलन रे समापन जळसे मांय भी भाग लेवेला। ध्यानजोग है की इण सम्मेलन रो उद्घाटन गृहमंत्री अमित शाह कर्यो हो।

000

अमरीका रा उपराष्ट्रपति जेम्स डेविड वैंस काले भारत री चार दिवसीय आधिकारिक यात्रा माथे नुवी दिल्ली पहुचेला। वां रे साथे वाणी पत्नी ऊषा वैंस अर अमरीका रा केई मोटा अहलकार भी व्हेला। उपराष्ट्रपति वैंस री आ पैली भारत यात्रा है। वे काले प्रधानमंत्री नरेन्द्र मोदी सूं मुलाकात करेला। उपराष्ट्रपति अर उनके प्रतिनिधिमंडल के दिल्ली मांय अन्य केई कार्यक्रम व्हेला अर अमरीका वापस लौटने सूं पैले जयपुर अर आगरा जावण रो कार्यक्रम है।

000

सिविल सेवा दिवस काले मनायो जावेला। इण मौके माथे प्रधानमंत्री नरेंद्र मोदी नुवी दिल्ली मांय लोक सेवकां ने संबोधित करेला। श्री मोदी लोक प्रशासन मांय उत्कृष्टता रे खातिर 16 प्रधानमंत्री पुरस्कार भी देवेला। अ पुरस्कार जिला रा समग्र विकास, आकांक्षी प्रखंड कार्यक्रम अर नवाचार री श्रेणियां मांय दिया जावेला। अठिने, प्रदेश मांय सिविल सेवा दिवस रे मौके माथे **राजस्थान सम्पर्क पुरस्कार** री सुरूआत करी जा री है। इण रो लगस राज्य सरकार रे सम्पर्क पोर्टल माथे मिली शिकायतां रे समयबद्ध अर प्रभावी समाधान मांय आगे रहवण वाळा अहलकारां अर महकमा ने पहचाण देणो है। जयपुर मांय काले होवण वाळे जळसे मांय मुख्यमंत्री भजन लाल शर्मा ए पुरस्कार देवेला। लोक सेवा दिवस रे मौके माथे जयपुर रा सवाई मानसिंह स्टेडियम मांय आज सूं न्यारी-न्यारी खेल हौड़ा री सुरूआत व्ही।

000

अजमेर मांय आज नुवो बण्यो जिला न्यायालय परिसर रो **लोकापर्ण कर्यो गयो**। राजस्थान उच्च न्यायालय रा मुख्य न्यायाधीश महेंद्र मोहन श्रीवास्तव कर्यो। इण मौके माथे जळसा मांय बोलता थकां मुख्य न्यायाधीश कह्यो के **निष्पक्ष, स्वतंत्र अर निर्भीक न्यायिक व्यवस्था** किणी भी आधुनिक अर विकसित समाज खातिर जरूरी है। वण कह्यो के भवन तकनीकी दृष्टि सूं उन्नत, पर्यावरण रे अनुकूल अर मानवतावादी मूल्यां ने समर्पित है। इण सूं लोगां ने घणी सुविधा व्हेगी। न्यायाधीश इंद्रजीत सिंह अर महेंद्र कुमार गोयल भी कार्यक्रम मांय मौजूद रह्या।

000

केन्द्रीय संस्कृति अर पर्यटन मंत्री गजेन्द्र सिंह शेखावत आज फलौदी जिला कलेक्ट्रेट मांय अहलकारां रे साथै समीक्षा बैठक करी। बैठक मांय केंद्रीय मंत्री केंद्र सरकार व राज्य सरकार री न्यारी-न्यारी योजनावां अर विभागीय कामां री समीक्षा करता थकां अहलकारां ने योजनावां रे समय सारु क्रियान्वयन अर अंतिम पंक्ति मांय खड्ड्या मिनख री सुणवाई करता व्ह्या योजनावां सूं लाभान्वित करणे रा हुकम दिया। श्री शेखावत गर्मी रे मौसम अर नहरबंदी ने ध्यान मांय राखता थकां जलदाय महकमां रा अहलकारां ने आमजन ने पीणे रे पाणी री आपूर्ति पक्की करणे रा हुकम दिया।

000

कोटा मांय आज अंडर-20 राष्ट्रीय कुश्ती होड री सरुआत व्ही। राजस्थान राज्य कुश्ती संघ री कानी सूं राखी जा री तीन दिवसीय इण होड रो शुभारंभ लोकसभा अध्यक्ष ओम बिरला कर्यो। इण मौके माथे वणा कह्यो की खेलां सूं न सिर्फ खिलाड़ियां बल्कि आम लोगां ने भी नुवो दृष्टिकोण मिले है। श्री बिरला लोगां ने किणी भी परिस्थिति मांय आप रे लगस खातर लगोतार काम करणे री अरज करी।

एस.बी. ओम बिरला

लोकसभा अध्यक्ष हौड मांय भाग ले रह्या खिलाड़ियां ने शुभकामनावां देवता थकां वां सूं राष्ट्रीय अर अन्तर्राष्ट्रीय स्तर माथे देश रो गौरव बधाणे रो हेलो कर्यो। प्रतियोगिता मांय देश रा 26 राज्यां अर केंद्र शासित प्रदेशां रा 800 सूं बत्ती पहलवान भाग ले रह्या है। इण मांय चुण्योड़ा श्रेष्ठ पहलवानां ने भारतीय टीम खातिर ट्रायल देणे रो मौको मिलेला। इण मौके माथे ऊर्जा मंत्री हीरालाल नागर, सहकारिता मंत्री गौतम कुमार दक, गृह राज्य मंत्री जवाहर सिंह बेढ़म, सांसद सीपी जोशी, विधायक संदीप शर्मा अर कल्पना देवी, भारतीय कुश्ती संघ रा अध्यक्ष संजय सिंह, राज्य कुश्ती संघ रा अध्यक्ष राजीव दत्ता साथै मोटी तादाद मांय प्रबुद्धजन मौजूद रह्या। होड रे दूजे दिन महिला कुश्ती मुकाबलो व्हेला।

000

प्रदेश मांय केई जगावां माथे आज सूं **संडेज ऑन साइकिल अभियान** री सरुआत व्ही। प्रधानमंत्री री कानी सूं सरु कर्या गया केन्द्र सरकार रे **फिट इंडिया मूवमेंट** रे तैत अजमेर मांय 80 सूं बत्ती लोग साइकिल माथे सवार होर निकळया। अजमेर रा जिला युवा अहलकार जयेश मीना बतायो के आ **फिट इंडिया साइकिलिंग ड्राइव आनासागर चौपाटी** सूं रीजनल कॉलेज तिराहे हो र पाछी चौपाटी पहुंची। सवाईमाधोपुर मांय भी **संडेज ऑन साइकिल अभियान** री सरुआत व्ही। और ब्यौरा म्हाणा खबरनवीस सूं—

.....

000

देशभर भर मांय आज ईस्टर पर्व मनायो जा रह्यो है। ऐडी मान्यथा है की गुड फ्राइडे माथे ईसा मसीह ने सूली माथे चढ़ायो जाणे रे पाछे आज ही रे दिन वाणो पाछो जन्म व्ह्यो हो। इण मौके माथे गिरजाघरां मांय प्रार्थना सभावां करी जा री है। राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेन्द्र मोदी ईस्टर ने आशा अर नुवे पण रो प्रतीक बताता थकां बधाई अर शुभकामनावां दी है।

000

प्रदेश मांय उत्तरी हवावां रे चालतां केई शहरां मांय तापमान मांय गिरावट आई है। हालांकि कई ठौड़ां माथे हीटवेव रो दौर अजै लगोतार जारी है। मौसम महकमा रे मुजब लारला 24 घंटा मांय दिन अर रात रा तापमान मांय 1 सूं 6 डिग्री ताई की गिरावट दर्ज करी ज्यी। 44 दशमलव 3 डिग्री सेल्सियस रे साथे कोटा सबसू गर्म रह्यो। जोधपुर अर बीकानेर संभाग मांय आज कटी-कटी आंधी अर तेज हवावां चालणे री आस है।

000